



柳田文庫  
文庫11  
D 85  
2



文庫 11  
D 85  
2

清容居士集卷第一

元 袁 桷 撰

賦

導游賦

陳郡袁桷家于甬之隅足不踰闕而四方交游往復之義亦能舉其槩聞吳興子昂趙子清名雅言為作導游賦道子所蘊亦以見夫思其人而不可見之意詞曰  
嘗悲乎好游之士閱終歲而莫聞非秉志而媚私亦飾行以矯羣方其命車於王良假驂於造父過屠繒之浦弔弦歌之魯許身結志慷慨偃僂抗銅盤以矢辭握幽蘭而結賦炫華堂之冰雪眇修途之霜露蓋將修斷金之利雖閱



010190555327

48-12129

清客集卷一  
牆而莫我敢侮息肩于門晞髮于廬不一歲月迨見夫蠅  
聲而歌倚楹而吁雖千里之異殊何老壯之卒逾也世有  
索居肥遯擊門塞竇尊委俚之聞友汗青之朽是猶談智  
於尺寸測日於戶牖猛虎嚙嚼幽狻悲啾獨行無儔謹操  
其翰粲彼一士與時偕藏具大塊之清淑服忠厚以自昌  
余將往而未得倚吳山以相望振衣中庭萬籟寂元頎形  
廣顙眴兮翩翩墜余以言曰懷辛之椒人或議其妖充梁  
之木人或惡其獨夫既自以爲直而亦豈不以爲曲阮生  
自持幾於目語削木已漫假手于祖匪達人之曠羈終察  
察乎廉隅余蹶然而笑喟然而思拂龜以占莫測其疑抑  
搔首而歛歎故髣髴以致期遂伸之以辭回城之璧佩以

容兮環龍之劍喜其鋒兮伊若人兮物不可同兮我欲從  
兮樂有終兮江山兮復長方舟兮可航辭未竟童子擁篲  
而前曰豈所謂千載之人耶吾當從子而西矣

雲林賦

若知雲乎昭昭然服光以廣微隆然廓然又似夫五色萬  
物而沈幾來弗以趾去弗以馳其始也盤辟夾輔輪輪困  
困孰合其處所其終也寸莛以興導轟轟啟鈴鈴汨沮洳  
襄丘陵若慕而佇若泣而赴愀兮哀不知所訴蜿蟬眇綿  
含英吐鮮迨傾蓋而忌返粲接席以爭先誠果樂乎莫與  
之宣形成乎無形名生於有名囿于家林允爲儀刑奉著  
占之曰居高而卑佩矩帶規升于木無往不復不泄不辱

言歸其谷伊南維湖將以爲居齊三日祝而涖諸蒼兮中  
峯式瞻其端爲章爲祥爲輪爲冠風以潤之雨以需之挾  
陰而噓乘陽而舒朝飛夕躋莫窮其栖有翼者鵠遵于其  
涯日將有行自東徂西綏而迎之維墉之崇施而流之維  
泉之通以沐以容是謂雲林之宮

元雲石賦

泗流迴淵禹朝步兮秉陰發奇靈鼇負兮玉質墨章浮帝  
都兮廉辨以清協磬濩兮堅剛洞虛積元感兮磅礴太素  
屹空嵌兮靜居泊如日儀以湛兮虛一闡圖握九讚兮八  
方宣明二儀竅兮抱形介貞合窈眇兮細細縕縕道之奧  
兮肇稱元雲吾將以觀眾妙兮

淳賦

粵若邃古仁風熙熙擊壤灌陰以佚以嬉巷無天瘡物無  
癘疵祥麟應囿靈龜負池樂以導和禮以黜衰齋齋其春  
渾渾其天守冲若虛不夸不鐫佩矩帶規養於深淵擬諸  
樸兮文理具宣擬諸象兮充然混完見不以迹視不以形  
斟酌大和脉胎粹精居之莫疑神維壹清若有若亾訖莫  
可名二儀細縕肇分化醇人行乎中孰全其真注茲元酒  
淡兮在尊御史氏尹敏學潛珍服習典謨葆厥靈根齋居  
靜儀人莫可聞攷諸庖犧其名曰淳

玉龜杖賦

有璞於此純淪氤氳瑤光之精爲靈爲文謹櫝以藏不泄

清容集卷一  
三  
孔溫穹隆中乾夷靜合坤淵淵其容澹澹其神爰有善木  
含章揚芬飾端以儀往來無垠鬱叢壽宮有粲者雲維季  
翼翼聿懷彼瀆跪而祝諸以奉番君曰履道坦而元吉者  
歟任重而不希其力者歟視下而無危嬉戲如兒審時而  
行得良以防抑心自強底夫康莊其形不孤其智若圓化  
而神之曷知其遷以相以持是謂期頤

桐柏觀賦

孫興公天台賦運意高簡忘象以求斯得之疑和盧君居  
是山以桐柏觀圖授余曰子爲我續繹其景不揆瓦石援  
筆爲之賦曰

厚坤載德台山效靈蜿蜒扶輿天孫之精仙書易之以桐  
柏敞神界爲金庭轆轤三光磅礴太空睇暘谷之倒影卒  
莫能擬諸形容也睠彼華頂羣山啟蹤倡九牧以執玉巍  
冠仰其容容香林玉霄夾驂以從華林不彫臥龍從龍玉  
泉御右法蓮殿戎東峙翠微西蹲紫霄巧面勢以規輔元  
肩沈沈乎次寥維妙有之珍館匪攀援之可求除三彭之  
內蕩守中戒以默修影息於鄧林機忘於海鷗上池飲之  
以洞視金膏服之而冥揆不然者良不能以久留也粵昔  
子晉韜精帝京弄參差於緱山搏扶搖以遐臨瓊臺儼其  
龜負雙闕屹乎龍蹲正右弼以贊化千齡髣乎氤氳故茲  
山也四面削成中心知掌真風合於冥廓梵炁通乎肸鬻  
三井之泉千尺之潭皋羽警其灑露髯羊匿於陰嵐飛梁

清名集卷一  
疑冰側足涉寒翠藤流霜觸纓捫緣梭溪交流以織文忽  
蟬竦之鈎連望飛瀑之懸絕日五色而成妍夫樂與餌過  
客所止夸誕逐魂踐形者恥長生之藥眇茫於神山執期  
之候詠譎於五利卻衰疏頑簡易理得其亦有所益乎菌  
蠢春秀質管冬萌五葉之松三脊之香丹光騰於金鼎冰  
泉徹於銅罌服食之而不墜身輕忽焉以復丁仝列仙之  
遺蹤葛翁策名於太極斗晶熒於樞紐金光雜流於瑤席  
納雷谷之砰磕窮幽淵之罔象丹鳳昔焉以來儀凡羽厥  
今以避讓諒守貞以制氣匪狡獪以增誑法不孤立道不  
虛行繼之者白雲先生受素書於軒轅襲帝胄於典午愴  
寡言而無營思坐忘以遐舉承唐皇之明問敷清淨之舊

章署漆書于寶幢迎黃雲於玉堂厥後憲章希夷範圍靈  
寶誦藥珠之元文過期頤以終考若是者誠何異於蓬島  
或有言曰樓臺榮觀方士侈崇夷考是山不綺而豐不幽  
而通廓兮其有容閎兮其訖逢味興公之抉奇訊擇木之  
寫真若增其嶽崱盡其竊淡身不羽而凌邈俄曾城以瑤  
林乃若丹霞伏光鐵柯舒英集眾妙以凝睇髣三真之傳  
經擬金剛於鐵磨警黑業於鴻鐘何錢李之二王莫能悟  
其祿終猿抱子以望月虎伏威而調風靈瑛清以集鸞哀  
弦急而驚鴻爰自有而卽無眇壹氣之鴻濛悼南國之蒸  
歊髣天都之肅冽彼夏蟲與火鼠徒自煎以內熱申之以  
辭曰

帝子下兮雲中質通明兮粹沖覽炎洲兮垢紛節容與兮  
茲峯蓬瀛杳兮無極浪滔天兮不可以展境荒滅兮妄益  
曰此畱兮吾將以內息神爲尻兮氣爲輿朝紫霞兮暮清  
都黜視聽兮道靡渝歷千劫兮復故初雲凝素兮中壇鈴  
流露兮日暎三災屏兮嘉祉繁語夫世人兮歸休乎靜觀

椿堂賦

爲宜春彭有  
年道士作

昔嘗疑夫漆園之叟學習而逃虛詢蟲魚之疏考風土之  
書莫之敢圖余游上京有容北窮夫金山西歷夫賀蘭南  
踰雕題東超三韓蹶然而言甚甚禹跡子所履者誠然乎  
冬裘夏葛寒暑之運環也今也日臨中街霜飛冰霾毳集  
於踵貂挾於懷戴斗接浙承露凝梧子安視而靡猜駭聞

忽見知奚窮乎齊諧吾先枚夫九州者而言之屢熟之稱  
南州是專十丈之蓮華峯所傳枯化石以錫貢樟生庭而  
爲州梅梁分以鎮妖泮河肇乎維舟杞犬吠而質變漫人  
形以劑投華平維常瑞於皇圖冀莢屈軼盛於堯世木沈  
產子以成國樹古眩精而爲魅松分秦王之封柏擅蜀相  
之祠若是則復何疑焉在昔大帝窮源崑崙見北溟之鵬  
視之若雪卽之如雲得其遺羽丈尋不能以論是齊物者  
非寓言也耶維老彭之遺裔握六氣以自馴肇茲齋居其  
名爲椿二儀網緼周流無垠則以自儀道合至淳吸兮若  
韞旋兮若輪肅兮似秋熙兮如春行乎六合而不躓則所  
謂八千者吾猶以爲成年之稊米也客揖而去遂爲之賦

仁壽堂賦

合江老人杜 年八十有二其鄉人尊之以仁壽因名其堂子輝卿今爲蜀省掾來京師求賦賦曰

合江老人生於三朞歲之中秀眉疎明鯨背隱隆家事勅斷遺聞春容口欲宣而彌哽情屢發而莫逢會稽生揖而進曰生居東南襲輕飫甘耳不屬於鉦鼓目不接於戈鏃合江之事相傳於游談願削牘書槩俾鴻筆以有參老人改容正襟往似可尋夢若初覺病猶在身方其誓師斗城滅親割情盟重於白馬命輕於浮塵黃風颺沙千戍屏營擁若波湧排若算經危堞隳而礮激關戟護而矢承覽者瞽者各有攸職熏室旁穴且不遑夕壞館門毀甃石樹列

對峙填負旁阨卓飛泉於雲根起清流之千尺目不能承睫氣不得納息黑祲障空燐煙蔽江橫厲排蕩扶擊春撞擬效順思投降提獎之主怒莫敢當忽風斂而川止活噲喁於鼎湯噫嘻吁此其瑣謝者耳華陽之往躅肇於文翁悉於太沖纖侈日滋由是鑠景福盪醇風鬼嘯高居神泣巨峯棧閣如砥萬騎突馳火連摩圍氛翳峩眉築京觀以專戮甚橐街之陳尸順舟而下者十不得一緣澗厯塹視京垓之豪釐崎嶇古渝前彭後余保衣冠之弱緒猶興文以舒徐逮夫六合會同彈丸震驚發渙號以澡雪緝政俗以治平則夫兩州之士民無遺鏃之害歌帝德以底寧會稽生仰而愀俯而笑在易之象復存於碩果物極者斯通



清容集卷一  
盛過者斯禍維今老人熙熙其天休休其心事至不伎智  
藏惟淡式是表儀化而怡淫國有耄叟鄉有善人仁壽錫  
名爰則其淳感古樂今茲其爲擊壤之堯民

樂水圖賦

東坡先生脫遠游之履衣紫絲之衣與黃冠師跪坐息機  
臨清冷之淵憇巨樾之陰意消言忘其得在心飛泉琮琤  
寒源杳淡悲塵寰之隘險抱奇璞而莫陳將以善夫濟世  
之極樂至理以自新維茲水之無倪非智者莫能以鑒彼  
河伯之好夸終望洋而浩歎翳西海之沈羽竟其說以怪  
誕小大不同其病則通駭於所聞者忽所見誠哀乎舉世  
之盲聾余嘗披神禹之地圖考先生之轍迹而誦之方其

發軔于瞿塘千里一瀉鑿燕安之醜媒悟孤孽之非禍雖  
盛氣之飄忽已足窮物理之化迨其中年倦趨分符東上  
慨河流之奔駛城不沒者三板先生胼胝以先激而返之  
有以遏其性之狂悍伊文登之貝宮空百司以自獻實精  
誠之冥通異燃犀之獲譴至於羣妖肆憎百懾相乘先生  
怡然而行試正命於巨浸儼安流之無驚耿耿明夜乘桴  
南歸海若息波馮夷效奇混六鑿於一噫信天地之不公  
匪淡於水者其能若斯耶玩王孫之游藝弄五采於素絲  
聽之而無聲卽之而若遺若然者欲以求先生之所樂無  
異畫餅之充飢

餘閒齋賦

曷不觀夫農父之治田春耕夏耘晝作夜緝望歲常有思  
憫苗若不及候其陰晴謹其涼熱食不滿嗛目不承睫穡  
事告成以祀以享入此室處曰余將有養休其四肢里閭  
熙熙甕牖迎陽茲其爲一歲之隙得以自怡者與古之志  
士範圍天地之初冥揆密籌心如淵珠據會以集要積神  
以合虛冬爐夏葛謝而弗居逮其蓄極以通若燭計龜卜  
物莫能沮燕居申申欲不踰矩倚門而歌聲裂金石恢乎  
其有容順化而有得蓋其勤者若此則其終也乃以豫佚  
惟昔賢之肥遯屹乎其頽波青林扶疎擢茲瓊柯味道以  
觀澹乎不頗閱世推移飲茲無何養其粹精不激不阿有  
容仰止撫其嘉名以處以息慨然而言曰悲濁垢之駢臻

御吾輪兮焉窮愍逐日以道死異惜陰之度功厥今金馬  
公車履舄接踵承色以求爲疲爲冗退食以休濯其靈根  
藏真養恬疏清滌裨庸式庸似著于門顏維四民之有制  
實士農之居先惰于初者躓于後弊于智者罹于艱歸休  
乎君援琴而歌曰羣動兮夜息貿貿兮吾徒曷猖恣不能  
以自適書兮在度聳兮在席復吾初兮以無忒

息齋賦

慨太素之日凋服仁義者亦幾乎外馳百司眩晃眾愛糾  
縻側身於積薪之上試命於累卵之危髮盡化而齒將終  
竟不得要領以自持端木之智工於言結駟之德色索其  
中誠餒然也史遷之足老於行悲憤之書不能以全其生

也東門之悔華亭之悲是猶碎轂而大輻掘泉而止渴何其遲也古之至人止於其所不止休於其所不休兢兢惕惕不得而名之強名曰息夫息形者神清息事者愚絕息心者心愈馳息名者名愈徹莊周之息影爲荒唐陶潛之息交爲慨慷是皆未得其當若然者其必有自息之方夫知古而不知今謂之陸沈世故之岐多人事之機淡生乎下都兮又安能超舉以絕塵維李侯之靜好藹鄒魯之淳風不求異乎人默息以底于鴻濛振纓而趨簿領如芴上下雜糅否臧混淪一息而求之何異解牛之芟刃眇目於毫分也退居申申圖書領賓不喜不愠寂然含珍吾有以知其息之外陳者矣夫天地之理動靜濟焉偏一而用則

爲五行之沴人身之氣如車軸窒而不流則爲疾癘爲末廢若侯者其何以爲息之體而余以爲外陳者豈侯之意歟他年成功而歸晞髮於彭咸洗耳於箕頰味乾健之旨以極君子之理吾不知侯之所謂息者其信然耶其寓言耶

凝雲石賦

爲張希孟作

文登之宮積濤成雪天風蕩摩海氣勻滅欽崆峒蜿蜒堅若金鐵大者成巒小者成穴蜂房羣綴蟻曲百結爰有張子扶奇發珍藉以文錦炷以古熏陋博山之侈靡髣爐峰之氤氳湛然塵消號爲凝雲有客哆而笑曰南山朝儕奮搏無垠太素爲母五嶽爲賓合虛成形積潤以神今子友一

清容集卷一  
拳於几席雲何自而凝哉張子倚梧而言曰窘尋丈者不能以喻大語荒忽者適足以資怪人惟至靈品物是賴明而通之呼吸萬籟決爲奔騰興爲靈壽其來無趾其去莫閱唯古至人韞玉以匱藏明于幽養神于獨內澄外觀塔若槁木靜以自儀無喪無辱念此石友其德不瀆燕居相忘庸以熏沐則夫所謂凝雲者不待於外而自足也客喜而悟遂爲之賦

紅梅賦

閒閒羽仙朝歸絳都冰渟雪峙湛焉澄居候寒圭之微影察眾芳之榮枯草藏萋而永闕木脫葉以無徒彼陰陽之眇密曷能返乎元虛於是天迴景溫機抉候促吉雲豐融

美虹纏屬睠炎洲之嘉植澳乎其忍此垢觸也儼藥珠之揚靈貯初服於太素沐九苾之粹精蟠翠氣以內護赧容耿以自持兮抱冲密而莫吐衣赤霜之羽袍曳文錦之靈佩棄明月之寒璫綴飛瓊以爲珮匪徇色以自誇表昭質之莫昧凜世全之如焚旄微愠以御背惟溪根固蒂之不可恃兮將求化以養晦繫煒煜之滑稽懼夫惡朱者之見毀鵠日浴以穀離鶴舞丹而希壽念形色之莫踐徒變习以眩售萬籟凝寂穆然長思絢此的皪申之以辭辭曰貌充心明道之腴兮葆光突貞慎德樞兮渥丹自持惟受初兮不爍不騰莫可渝兮時至神完吾其敷兮吾其敷兮物莫與俱焉

九華臺賦

混元之峯鬱爲仙閣，霏青駭紅，嶽峯相扶，下垂清溪，百流是趨。昔有羽士恍兮，承附縞衣，元裳其化，莫追爰有堯年之叟，植杖戒鉏，顧瞻童土，式崇墳壚，黜幽導奇，以薙以除。層臺演觀，積成爲郭，拾級以升，家林滿圖，乃擢孤芳，絜泉廣疏，錫名九華，葆茲清腴，有客蒞止，披情徐吁，曰登高能賦，大夫之職也，爲我賦諸客曰：皦皦廩秋，天風奏竽，哀鴻赴空，寒蟬抱梧，脫者如掃，縮者如枯，落妍斂英，還形太虛，存莫可禦，去莫可居，相彼九華，孰爲有渝，含章金衡，承元坤輿，弗媚弗私，苦心秉愉，迴黃抱素，包寒紛敷，飛霜溢露，言沾其濡，獨立養完，孰云彼汙，世服校靚，飾脂效姝，嗜腥

參醇洩甘，芼莢維爾，茹口哆焉，如茶耿持，空榛曷知，我蕪叟曰：好不可一，鴟鴞螂蛆，鈎以爲直，石以爲琚，變奪五采，睢睢眈眈，已或自售，適增詆誣，寄懷於言，觴至不餘，九九默操，嗒然蘧廬，我生之辰，天清景舒，庸采以修，庶其遂初，山空無塵，白雲在裾，歸與歸與，吾以子爲徒與。

墨竹賦

屹書林之邃，清襲空翠，以膏沐察羣芳之交，妍糗紫芝而不肉，化蒼煙於寸穎，皦森束其寒玉，有客叩門指而言曰：天天申申，吾不知其親，惘惘款款，吾不知其怨，懼獨立之絜矜，徒三則以自獻，爰有童子擁篲，以前曰：東南之美，以植則繁，大盡斲採，小爲烹煎，曷扶其清，孰庥其生，零西摧

東山崩谷鳴取億及秭莫知可名維我先生念茲磅礴揆  
[元]窟之太和布靈根於眇邈取方諸於承露和不死之至  
藥寄遺跡於須臾避[元]冥之饕虐故其凌風出塵廓兮如  
神承春飲鮮從兮如雲疾掃卻顧猶歐冶之鑄郢人之斤  
也且客獨不觀夫鑑之與形媼妍修纖各窮其精惟靜者  
能以燭至動而所謂談譎變习乃足以覈萬物之情望南  
山之崔嵬目九日而不瞬匪好夸以眩奇良以解夫諛聞  
者之慍語未具先生振衣坐忘與客相顧卷縑以酬一笑  
而去

素軒賦

太原白無咎徵名字于易復以素名軒實維其祥乞賦陳

郡袁梅賦曰

維太初之混茫兮眇昭質其孰分二儀迭其交媾兮肇清  
濁而成文翕九垓其同風兮佩鉤矩以播芬邈焉黃唐之  
仁聲兮極黼黻以成憲忠與質其相環兮迄蒼姬而莫變  
亘終古之同軌兮成後來者之過眩徵載籍於竹簡兮淳  
風鬱然以未墜憫太和之淪胥兮希絜己以自致三熏沐  
而揚靈兮儼前聖之遺旨悟宣尼之自筮兮緜告之以不  
樂曰丹漆不文兮白玉不琢質不可以受飾兮道不可以  
雜敦厚靜止兮弗居其華惟無色而自色兮物莫能與之  
加爰錫名以表厲兮雖顛越其靡它凜世垢之渙澀兮蘄  
旁證以冀直聃演言以清淨兮戒目盲於五色墨諄諄以

兼愛兮悲勞如其何益冕朱裏而外元兮袞襲裘而不裼  
淡元酒之無和兮輅盡誠而越席顏執仁以不違兮烟虛  
室之內煥商舉隅而起予兮懼絜矜夫倩盼噫童子之微  
言兮警曾氏之華睨捨沐浴以孤泣兮兆有知夫孝子乘  
結駟以夸容兮終內熱而殞愧車美澤而可鑑兮曷栖栖  
夫靡止彼馬師之食藝兮亦能遺元黃而洞理羌若人之  
好修兮如芳澤之日恣將乘飛廉以上征兮揚古帝之正  
則愜幅款款而彌貞兮固丹府之介特書盤盂以參倚兮  
慮夫龜之不食揭嘉名于戶冊兮振白首以莫忒申以辭  
曰茫茫重元物之先兮剛柔相摩文以宣兮反初復真德  
乃全兮履素莫渝吾將以無愆兮

冬窩賦

濟南潘仲德家商河治其田廬塊土纍石以處左經右子  
刻意厲行斟酌度古昔將力避世不復近歲終順陰陽之理  
慎居于中而名曰冬窩未幾聞于朝爲太史屬太史職清  
簡仲德獨憂之復以昔日命名者揭以自警余聞異之爲  
之賦曰

噫嘻夫世之善養名者豈惟冬與朝而興夕而趨執轡在  
手承塵滿裾僕夫告痛寒冰厲鬚剽飛英於窶數巧膏沐  
而睢盱懼分忽之不前戒良哀以先驅矜清揚之婉婉猶  
春溫而于于何自而冬乎大盜之智不以眩篋巧賈之利  
不以操割蓋將足不超闕而踵接其席目不承色而議推

其德美容峩峩雅言迤迤爰處爰居載笑載歌闕無傳之  
靚邃又何爲乎冬窩也哉潘子曰不然冬爲天終萬物蓋  
藏陽微如芑外枯內傷甲者若縮伏者若亾裂者爲阱疑  
者爲防歛吸以吹浩漾莫當口含飛霜睫承流漿三光青  
熒五嶽仆僵故其蟄處也隆然以龜淡息而卑卑其徐行  
也蹙然據危俛僂而施施疏房上宮連氛累靄嶽崑阻淡  
束縵以載鑿坏者遁煬竈者遜當此之時食不飽菽藿衣  
不襲裘鞞悻悻然角進而憑陵將弗折而自缺且夫藏明  
養陽必謹其獨大智若辱大容若谷紛載籍之蘊祕糅眾  
說之桎梏折精華以彌縫豐蔀屋之光燭吾非以岷巖爲  
居鹿豕爲娛友幽閔而棄斯徒也念居蠖之未伸凜自縮

而不憚謹清寧以冲嗇御六氣之寇沴將以游乎萬物之  
初順四時而成歲也

榕軒賦

南粵之區溫風夏摩積炎吹雲流金爲波少負老息盼茲  
庭柯爰有弱木攀緣嘉生連理纏結附枝膏凝蔭旋萬牛  
廣容專城千柱承宇百尋傲空羣焉莫爭希賢同風長與  
少殊如印如容溜微生於一髮寄豐壤而敷茸詎擁腫以  
丐全眇顛波之容容厥類滋夥其名曰榕東魯先生見而  
笑之曰目無常形嫫母以爲能耳無常聲折楊以爲清美  
醜相乘孰完其生眷茲連蜷棄諸同辭薪者鄙之斲者訾  
之輪者絕之器者揮之夫好惡不齊莫與之爭吾何行焉



舉觴以噫噫極而歌歌曰木之誥誥匪委佗兮木之萋萋  
匪婆娑兮巧爲彼矢名爲彼戈徂徠維松新甫維柏奈何  
奈何客有踵門而言曰議物產者必以良舍所用而求無  
用將安所嚮先生曰多謀者神泣多才者形傷維彼阻窮  
百虐備嘗蔚然以修充然以光四海立賢勿云其方窮髮  
之北殆將駭兮榕兮榕兮吾以爲楷兮

復庵賦

爲恆山李謙父作

揚子之衝千流交趨蔽帆雲凝炙轂雷噓塵奔瓦聯擁關  
闕衢土衍隰勻淡耒廣畚百技眩衰千賈獻姝爰有倦游  
之叟卜龜食吉構茲磨麻不斲不璧茹玉芝而三咽膏元  
髮以若漆與客瞰空觴而言曰今夫所謂歸老者其名鮮

鮮其行暖暖脫機於韓盧之吻息影于菟裘之巔造者絕  
屐奉者謝饋嘗仰屋以歎感極以悻悻極而悔黯崦嵫之  
吳離揚滄浪而莫饋若是者吾奚以爲歸世有習靜之士  
逃聲於無形避害於有名山鬼獨嘯悲猿凌兢掩耳疾匿  
脫焉如驚是焉知天地之性哉磅礴之理不能以獨運慘  
者舒者疾者徐者足以窮萬物之真維昔此邦犬牙東南  
前江右山朝煙夕嵐憑高而望則去者如箭淨者如練杳  
者如線效者如獻日出而作連岡燒空交蘆舞風土臺崔  
嵬野田豐茸昔之荒煙蔓草恍不知其處所寄遺蹤於白  
鳥問秋風於賓鴻夫觀萬不同恆維其機今吾乞身於未  
老寄此土而食於斯也素書滿牀旨酒在卮鄰熙社恬子

順孫祇不脂不韋不激不靡視昔歸全而索隱者相去幾  
希靜者動之根息于外者其內若焚川流徂東龍返爲雲  
日沈于淵朝升爲暎其本元元其生芸芸簡兮廬乎覩無  
渝乎又何懷乎土乎

擬剡亭賦

爲吳成  
季作

英英維祥織流成章雙峯嶽峯紫芝熒煌峙立澄冰元言  
飛霜爰有化鶴之叟迅翮珍館舒風盤霄歸而歌曰茲山  
兮沃膏陽霏兮夕濤吾還兮不崇朝將何爲乎逍遙昔之  
命駕者興極而意已盡臥游膏肓者不千里而接軫去若  
隙駛畱若柯寄情不及親豈我輩之謂耶彼櫟輪困爰衍  
爰漑彼桂扶疎以嗣以賚養苗者濯其嘉牧羊者去其害

植楹兮鼇負布藁兮鱗雅我季兮囿囿孫竝曾兮陳廡蹇  
獨余兮不畱目凝睇兮屢顧芳菲菲兮在林誓將築兮奉  
所欽卜龜兮于庭誼言兮揚靈彼簪兮奚投返真兮思冥  
學道者天完逸老者齡延順以養榮息以固形刻意枯槁  
者吾猶謂之善盜而我之髣象豈果有所羨而自表者耶  
道本於無名擬之而變成鈎深者泉如珠在淵遇風爲漪  
激流爲川彼剡伊何源遠不遷則而企之於亘斯年

餘軒賦

爲程士  
安作

世有好名之士佩玉長裾鳴騶導衢候者接踵對者奉諛  
日三接而色喜坂九折而懷吁欠伸委蛇顧而子孫且言  
曰夷考昔人吾何能擬哉榱楹闕空旌旄樹霄部曲中街

清容集卷一  
膏壤近郊悵兮屏營慨兮鬱陶若是者何囂囂也爰有靜  
士卑然素儒載尻爲輿游物之初粟不滿缶屢空泊如爰  
笑爰處擬諸華腴昔東方生見戲于侏儒翫世味道忘身  
之蘧廬維程子客于江之南幾四十年习者如飄風逝者  
如回淵禍生於公餗罪成於細旃撫心以思孰省其愆往  
游于其軒太古爲春無懷爲年揆圖宓戲受歷軒轅在易  
大畜剛止以育德日新而自足者也昔之至人道充以爲  
富聲出金石柳生其肘席不蔽坐飯不充糗今子之居酒  
時滿學蔬時滿把視昔之窶者溢且夥矣程子憮然曰吾  
誠夸矣

隱居圖賦

陳子築居唐奧之山復繪隱居圖據其某水某丘之雅名  
署於其旁以寓朝夕不怠之意每遇佳客輒指以示若挽  
而使之游從於其間也間謂袁桷曰夫畫以髣境畫之所  
不能及者吾雖知之而不能數與人言之且境必有趣趣  
之精華非言不傳也子其爲我據名以發其趣桷對不敢  
辭乃爲之賦曰

陳子倦游江湖整轅言旋顧瞻先廬徜徉里門四壁寒寂  
頽然維藩詢闔閭之遺跡儼中堂之猶存弔零落之舊叟  
撫徬徨之驚魂於是悲極而喜喜極復悟悟而言曰人生  
一世惟靜者智盛不可持翫不可恃三家之市其行跂跂  
四達之衢其言姝姝一以巧爲媒一以醜爲居吾懼其獨

立而誰與趨拂龜以占兆於唐山之隅若質而華若翳而明缺者如玦環者如城相其陰陽築室繩繩被以杉松瀦以芟菱棄塵世之喧啾牖乾坤之清明爰命雅客展以輕冰之楮化以五采之穎纖濃如春曲直若領吐秀獻奇發牘烟烟鄰朝川之清妍敵草堂之幽靚故雖踰江越嶠適市造朝挹此粲者神疑吝消有不待北山之移八公之招也客有言者曰擁裘而歌者意率類於慨慷登高而賦者事常失於荒唐吾敢按夫子之圖而代言其詳東越之區山水冠世發抉地靈前王後謝維君之居傲若神界若乃石塘界其前雷峯守其要馬領冠其顛羊巖負其奧周以青鮮橫以磊砢近若迎笑遠若卻坐欽崙何山挾輶以殿

浮游閬峯振弁以見上有石屋梁欂參屬紛披寒苔聯絡怪木恍飛仙之遺跡鑿幽竇以守獨前林杳靄丹光騰天伯陽一去而不返元鶴盤空而將還飲石室之寒露問山人之何年然此特隱居之外美析而舉之有不可勝言者矣晴原漲春千桃爛雲飛英滿溪織流成文支寒藤之瘦骨度略約之微險解瓢酌泉一舉三咽藹桑麻之故交爭聚首而繾綣前有惠林濃綠婀娜投冠解襟翛然清夏欣眾葉之敷陰訝楞梅之吐火秋畦離離黃菊爛斑爰泛黍酒駐茲頽顏懷千古之處士酌悠然之南山歲窮境空長木號風寒岑晃曜巋然中峯滄膏溢銀噴如飛龍匯爲澄潭窮髮鑿容烹以碧玉之鼎瀹以雲腴之茗神清意寒語

爽心冷蓋將忘塵世之事而淡以內省也相彼雙門圍茲  
羣山清風常來客去不關圖書自娛鄰社莫干有堂寬閒  
扁茲嘉名悼白雲之何往悲先友之日零瓊樓舞空清曉  
萬變默坐以觀翕忽詭刃賓天衢之出日駭青紅之紛眩  
鳥衝煙而辭枝兔驚林而絕坂嶺濛濛而人度露溥溥而  
葉顫念哀鴻之相求時遺我以好音緣小墅之橫岡花竹  
儼其成陰悵舉世之莫從歌風雨之苦吟乃歌曰歲將晏  
兮莫畱過故居兮懷憂山坡陀兮四屬吾拮据兮以屋懼  
世德之顛隕兮習肥遯以蓋穀駕余驂兮屏營耕石田兮  
腹果究出處之何心兮幸余髮之未化爲我語山中之人  
兮吾將歸老于其下  
清容居士集卷第一

清容居士集卷第二

元 袁 桷 撰

騷辭附

愍誓哀謝先生

受穆清之元陽兮一精白以抗修閭闔睽睽其初麗兮執  
正辭以告猷黯朱光而不燭兮妖羣立以縱恣飾詩禮以  
逞誣兮曰余將焉所詣胷臆結約而莫達兮史告之以寡  
言心屏營以靡置兮導旌旆而爲之先揭德華之魁壘兮  
勵來者之不前一成旅以興邦兮佗然莫余敢擬州纍纍  
以十百兮夫何寬衣而廣袂燃積薪以逞安兮羣豢食而  
自戲竭精液復疾呼兮卒莫能進其詞振飄風於林籟兮

清容集卷二  
葉脫故而懷新眾喁喁以雜居兮謇獨立而號呻矢危忱  
於帝闈兮星委地以如珮何執愚之慎矜兮守隘說於顛  
沛持空薄之一髮兮振千鈞於層冰力弗勝而殆兮猶夸  
夫守道之經企女紀之傾輪兮極迅翼以恣往九疑靈妃  
慘玉容兮鏗鼓瑟其音蕩重華倏焉以冥邈兮凜舊德之  
日喪乘桴游於中流兮海若息波以竚望棹夷猶而靡行  
兮羌何爲乎此路若然揚靈窮晦冥兮朱鬣乘旗挾以震  
怒澎湃蕩簸激回渦兮爰淡逝以歔歔懷縮慙而失據兮  
寧忍歸夫故居死無能終報兮生莫知其曷圖貴化人之  
冲漠兮絜肥遯以自遜蒙垢紛爲汙濁兮薄日月之吐吞  
鑿門竇於荒滅兮屏精明以黜聞超飛霞而上征兮遇武

夷之神君逝者翳于山丘兮夸誕逐逐其營魂覽三聖之古  
簡兮宣尼實爲之彌縫謂道無古今兮孰與之傳虛九九  
而內明兮剛柔錯焉以敷宣翫朝步之奇文兮握奇五以  
黜煩建中極而滅端兮成品物之自然湛然一以貫兮曷  
知其後先數京垓以成變兮迎拒之而莫偏斂莫知其跡  
兮爲道之全夫形旣不可以久擅兮神與之爲橐籥迫朝  
逐而日騁兮引正命以自絕棘棧棧于車道兮精離榦以  
蕭屑秋陰憊其淒骨兮熠螢光之明滅手三秀而不忍茹  
兮腹殷殷其雷裂奄兮愀兮忽以放逸兮何昭昭其章徹  
亂曰元神凌兢兮命壽不得長闢葺曼衍兮旣樂且康  
眾皆馴帖兮靈胡然而秉方擷雲英兮微光佩雜芳兮彌

清容集卷二  
章駕赤鯨兮騰驤絕六虛兮放八荒注北斗爲漿兮內熱  
不敢嘗林有桂蘭兮水有鱣魴所思弗見兮奚故鄉絜眇  
風兮樂未央吁嗟逆化兮何怛傷

廣招

淡寧先生乘虬上征江海殄瘁湘纍遺痛千載猶一日也  
柳車爰行瞻望永隔門人袁桷竊取宋玉招魂述廣招以  
反其義其詞曰

竊獨悲此翳濁兮身鞠憇而莫明服三后之貞則兮秉忠  
純以內兢繩古義以自抗兮懍微躬之莫勝懼天命之不  
吾與兮晚更號以淡寧委靈魄於元宅兮挾清神以上征  
重華慘其無容兮矚下矩之險隘侈九夷之曠邈兮申前

聖之遺戒一去而莫返兮八靈孰能以震駭乃命小臣戴  
縱秉旄注精高冥而下招曰茫茫封丘麇豕萃只炳靈奔  
飛杳交會只嬋媯清芬孰返旆只縱橫幽房雜厖怪只魂  
兮歸來其益以駭只東門熒煌平蕪層陰只靈宮紫芝萎  
以泯只流鈴搖空訴夸淫只元蛇蒼鼠若擾馴只魂兮歸  
來激越吟只蹠躑蹂躪白蟬飛只滅方鑿迂傳致以肥只  
鬪青綴白眩纖奇只折楊黃華司體儀只魂兮歸來彼相  
疑只沃隰修畛鞠薺茂只狂夫冶游胡憺後只南山白石  
曷以永年只式擷其薇悵周原只歸來歸來其孰能寐魂  
只愁雲旋宇陰籟振幕只素空霏塵清晝激雹只虎雌黃  
目屏陳設只精鑿後置爍蠡施張只伊嗚仰天雜猖狂只

甘腥恣睢禮不可防只魂兮歸來悉無以當只魂兮乘桴  
登瀛塢只海觀日浴爛紅殷只哲容長裾襲古先只漆書  
竹簡遂研鑽只崑崙穹隆疑有至人只妙顏紫綈休德日  
新只吐珍納和與道爲鄰只雕題祝髮禮讓興仁只桂蠹  
咀吞味芳辛只幽蘅嘉芷佩孔文只相羊湘纍肝若存只  
承挹清塵徘徊翩翩只天光淳耀會弁森扈只肅容展威  
受多祐只斬凡破觚斯黃輔只龍圖昭回布高矩只開陰  
蔽陽庶類蕃嘉只捫厯箕尾建崇牙只翦理姦巫靜無譁  
只照示下土循義媧只河公海神瑰以迅只貝宮鮫室祕  
怪雜孕只瓊英琪柯錯繽紛只鞭龍誅蛟霈澤湛潤只魂  
兮遠游戢凌紊只揚歌舒嘯化幽憤只重曰嗟所思之不

得見兮儼冰雪之遺容緊遲遲而容與兮松柏日其蔥蘢  
悵幢帷之咫尺兮長虬脫焉以追風蛻塵居之險艱兮捨  
崇蘭之新封墳篋迭其和奏兮聯雲車以陪乘粲琳琅之  
遺編兮俾泯絕之足證匪離羣以自絜兮誠不忍夫騫騁  
超整駕以言從兮懼見譏乎後聖揖虛漠而言旋兮耕書  
田以振厲諒神明不吾欺兮庶終承乎嘉惠千秋兮靡長  
白雲兮相望魂兮歸來其毋我忘也

七觀

翰林先生納榮息機謝白玉之堂將歸于麻源之山房越  
公孫懷牘濡穎託物喻志考圖審曲若鑑之納視言忘而  
意消類別而理備有郢大夫癯然褐衣目不接乎黼黻耳



無聞於律呂輾而言曰登高能賦淫曼荒忽智專者魂強  
形滯者物逐昔吳州來觀詩東魯言有度徵有據厲階於  
枚生濫觴於曹王先生楚產也雲夢汗漫巫峽噴沔胃藏  
腹蟠公孫不足以教我先生殺青南山積簡羽陵若網有  
網若墨有繩舉凡暢微我其聆諸

越公孫曰太素烟熅清濁奠儀雨風露雷動植攸孳辨方  
審良民用不疵六氣以沴日天其世彼諄諄者皇曰汝命  
實長厥土燥剛相其溫涼我生命在天順以受年巖居谷  
飲中道以隕執書以觀有涕洟瀾陋彭鏗之逆理兮何恣  
縱而益顏言技可以進道兮吾當由是以返觀納腸補藏  
潛忍莫竟石立土踊字彗逆吾猶以爲天地之病也修

身俟命道之大經先生之正也大夫曰神之所行何體何  
方拘者爲儒請更端以告僕夫

越公孫曰靈曜宣精五紀順明察幽考微法天以行形氣  
芸芸吉凶卑高觀象以分韜兮靈根感不以言由動彰靜  
百神受祐虛者爲音質者爲數昔后稷氏之職黍稷蕤蕤  
智者過謀胡盡其地力民日作慝相攸食墨風雨斯蔽連  
雲岌業飛不得垂喙履不敢仰視旁營萬家地記萌牙赭  
衣僨蹶而淮水復絕鑄鼎伏姦能沈于淵吁嗟而求桑林  
之羞要荒擾馴王會盈庭獻璞效珍物不可枚陳雞豚以  
時父恬孫嬉何助邊蔑思屈曲洲島家累千金資先生昔  
居列仙之館據要集思謂象以理明妖由人興守諄苾法

清寧卻走馬于郊謝重譯之雉陋三脊之茅熙熙陶陶舒  
舒天天不言而歲成無營而事貞夫子不云乎一致而百  
慮其是之謂乎郢大夫曰汎觀博聞於道彌損願滌耳以  
扶其蘊

越公孫曰粵昔尼父唯俎豆是敷擊刺坐作因民以教蒐  
苗獮狩車徒卒究厥今輿圖八表同厯四貉交軌月竈風  
亾冰天桂海馳心望雲請命款塞千廬星環八屯山列羽  
林繙經飛騎鼓笈然而樂成者難與圖事守文者不足語  
智嘗聞之兵農同封耕戰同功魚鱗雁行敵莫我敢當府  
散籍移萬姓流離強帥拉脇外寇憐肌卒不可拄支後王  
鑒觀法日以繁厖者罷者恆者羸者駢頭引吮食粟而嬉

開門納兵百郡是師何草廬高吟崎嶇雜耕何杜氏之子  
傳癖孔淡而緩帶以征射以容觀劔以氣言批亢擣虛孰  
知其隅折衝壓難莫窮其畔至若握元圖視龜文縱橫起  
止與易象相表裏者驟語之吾懼大夫之竦眙也大夫曰  
兵者不祥之器未效此知也

越公孫曰炳靈心君闢乾闥坤情聲相宣立度出均昭昭  
鴻藻緗縹是存敢先論楚材而言之謬謬乎形畏垢而將  
翦也霏霏乎睫承露而欲訴也荒蹊斷葦燐滅沒而疑聚  
也織文揚徽攬芳菲而雜組也少焉商飈號鳴金石琮琤  
逐虎搏兕鞬鵬鏃鷹寄莽蒼於一瞬乘扶搖以孤征終緩  
轡以就日愴倏淪乎西傾噫悲何爲哉古有巖居之士抱

奇挾幽漱芳澌林憩寂凍流愴乎其若遺窈兮其若畱鉤  
盤助之爲回旋虛牝答之爲獻酬猿三疊而墮淚鶴九轉  
而凝愁鉤元採微迄無終窮瑤席敷張高歌慨慷語初麗  
而終放託餘韻於宮商然此其彘彘者耳攜拾蒼雅刮磨  
誥盤微粲貝編飛英露溥何譏乎肉食之鄙猶鄭穆而魯  
桓也大夫不聞之乎鍾石絲竹各隨其聽隆汙有時其所  
遭者命摩盪堪輿吸呼羲娥矢爲帝詞叶爲賡歌五嶽贊  
襄百靈護呵不棘不茨如砥如磨發潛漏泉掖民陽春瑰  
逸爲新簡絜爲真列若戶居別若渭分雍容者珩璜沖遠  
者英莖縷絕而緒續醴甘而齊清昔之擅名偉著耿兮其  
不能以十百程也浮聲切響直意肆志澎湃訇溘滔滔莫

止据理者夸飾言者哇嫫母兮姑射鉛刀兮鏌鄒譽莫任  
兮奈何大夫曰文章與政通玉署之職也文勝質則史更  
言其大者

越公孫曰矻矻中壘校讐靡寧世本年紀繫于麟經捨相  
府圖書泯其緯經炳麟金匱沕罔敢配乃司馬氏決榛鋤  
翳麗者爲譏激者爲刺升涉世家表籍作紀言諸侯無史  
史立周圯鄙儒畫墁削章刪凡燭火竝日卒漸盡莫傳昂  
昂荀袁辭約義完何班范家至耿光綿綿相繼擬述百世  
一律素王簡編如日在天熒煌高張孰敢附肩鴻化以瀆  
研揆益疲穢者闕者襲者濫者渙溷畏禍希企市價諂不  
表直俚不師雅若鼙鼓鍾若盲策馬元經附訛唐歷受呵

後有紀略迄莫同科尹石猛志證古比事百不一試歐陽  
氏出方名山所藏復大同而小異勢不兩立其魯史之謂  
厥今繫諜川盈記注櫛比故志存廢興之源典章酌損益  
之致登瑤山而神駭游鄧林而目眩般倖效吁隨和發涕  
操觚之士吾將見其心赧而神悸也先生登祕丘覽羣玉  
積石倉標朱目墨兵筆削融液乎粹精圍赫胥鄰大庭大  
夫宜從下風而乞靈也大夫曰皇王惟熙帝霸孔熾我心  
增悲韓愈不爲史名以四馳何庸知焉

越公孫曰煌煌古帝別生聚方煥乎陶唐五服正邦五典  
率常導之無違民用熙熙授之以時聿來孜孜降于三王  
厥緒曰孳集成于蒼姬黼黻憲章金石命令緝熙太和宣  
昭羣姓織鉅之備粲乎其有秩也豐殺之制屹乎其有截  
也三光重輝百辟拱列歲時易移而浸淫蘖芽弱者綴旒  
强者鋌戈智者揆囊勇者拔河搏犀象屠蛟鼉飛矢請命  
旁午係車焱乎浮雲迅乎奔塵炙轂滑稽之士紛然而竝  
陳棄仁恩假鬼神混君臣各馳騁而懷新數千百年人亾  
而說具勞乎離婁不足以一視也繭乎王良不足以一御  
也其最大可病者恬泊守真可以養身不可以治民絕性  
棄命黔首蝨病孟軻氏有作吾見其髡鉗而舌咋也言未  
既郢大夫曰天藏山中瑾瑜匿瑕問以辨之厥德日華儒  
者詬病卒不能以勝何道最高子盍陳之毋激毋勦  
越公孫曰古昔顓童受業閭塾書數首通訓故是屬聲歌

象舞目接身服相親有恆日用不瀆後帝不相襲緣祀興  
文八音寥寥五禮紘紘鏗鏘莫明而聚訟若焚鄭說乖誤  
後圖踵循象制益湮周官別出議者欲一繁紊綜錯操網  
而入林適越而轅北也類禮孔勤五厄莫存後有倣補去  
取未就卒乘虬驂雲字以文合聲以音比旁行敷落侏離  
狄鞮文軌同風不能以一致孔壁莫推二經蕃廡聳牙爲  
今簡儷爲古謂道統是傳曷敢有語詩基文王而周召先  
興首章異同眾說沸騰風雅變言美者爲訾直者爲詆魯  
頌紀異秦誓告終何後學嘗嘗迄莫之通麟麟魯經議口  
法吏謂齊晉無衰而日月具刺紛若蠶蝟眇若稊秕不虛  
其心不明厥視遺珠抱疑揆篋積毀然此特人文之經緯

政治之用體也三聖述作包河總洛二儀生於心萬化制  
乎神迎之而莫親拒之而彌存疑者遜者愕者困者湛兮  
消兮委兮昭兮沈思遺物形離超兮激迴颺兮闐而寥兮  
縱雲翺兮愴兮儒先從我招兮郢大夫曰始吾見公孫疲  
泐若不足突梯若避辱靡精槁神何斷斷然也今知子矣  
永譽處矣吾與翰林先生徜徉此土小年大年猶以爲朝  
暮也

梅不佞遺謀守儒號東南故家志學之歲先子命繕  
治書錄觀史志略錄部第時見舛雜稍長得博考先  
賢藏書總目矻矻三十年合傳短長乃成一家承旨  
程公作藏書山房于麻源三谷命梅賦之遂作七觀  
極道源委延祐三年歲在丙  
辰七月癸丑會稽袁梅誌

嶽麓圖辭

二章

嶽司南兮齊紫冥懋陽德兮炳靈二老兮素綦握鴻濛兮  
矢詞百泉兮一谷醜爲川兮爲瀆玉霏霏兮日光湛淵默  
兮含章至言兮在圖同八方兮遂初重華逝兮不返晝猿  
啼兮虎當坂

望臺兮薜蘿蹇一士兮拮据百楹兮承宇嶠山瓢兮以爲  
醕松風冷兮琅琅儼振佩兮高岡朱羲出兮揚靈積陰伏  
兮大明百泉飲兮在齒懷交流兮不可以止嗣德兮孔艱  
清徵激兮回瀾

悠然閣辭

鄙之西兮峰圍圍虎豹屹兮雄姿綬蜿蜒兮紫屬旌駮駮  
兮虹垂之人兮槃阿畏羲娥兮高駝築榮觀兮通明手參  
差兮以娛棟隆兮示背榮翼兮聳喙鑑匯雪兮鄙之區球  
有七兮日軒採鞠兮黃裳緝萸兮紫囊芳冥冥兮夕暉愴  
獨睇兮擬所思雲飛英兮山之阜爲子畱兮不遐以處秉  
貞兮神專觴彌劇兮益完山中之樂不可以久遲子返兮  
悠然

楊堅州治孟津金堤成作金堤辭

波湯湯齧我堤民昏墊晝負攜地不寧綠木棲楊侯之來  
承帝則順事陰氣神以懌赤蛇蜿蜒吸桂漿百谷受令故  
瀆常彼隰柔桑猗澤維杭侯言神綏曷敢功民言侯績天  
心通百妖伏精金石宣明三旬有役金堤是復

石田山房辭

大梁馬伯庸寓居光州作石田山房爲作辭曰

淮斂波兮練繪峰植秀兮翠旌翦黃榛兮布耕石粳粳兮  
稜稜思夫人兮造攻雲電合兮追鋒遺鏃兮齧足壤逸休  
兮果腹神符一兮告祺藹惠則兮貽思靈之來兮歲祠不  
鄙夷兮以嬉疏房兮笋席溫風至兮靚密儼竹素兮橫陳  
曰靜修兮手澤世芬兮日起百稔兮無斃石田兮有秋累  
胼胝兮吾笑以愁謹樹藝以自勗兮植先德兮無媮雖本  
兮穎豐導泉兮澮通夫豈不知有善歲兮吾曷敢燕遨以  
幸逢望八公兮巖巖王孫悄兮莫還積荒刈以自迷兮捨  
息土而弗芟眾芳婉其披離兮秋霜慘不能以實謝紫芝  
之療飢兮治精鑿以煉質亂曰苗誦誦兮善吾耘兮日出

作兮永裕樂兮學猶殖兮吾將以爲則兮

### 雪江圖辭

雲元積兮素摩挽義車兮馮河蘆戢戢兮倒戈岡伏匿兮  
鶴鵝昭朗兮夕徹羣動寂兮影滅超逍遙兮一舸食穀精  
兮腹羸地險兮曷憑馬飲波兮夜騰委素練兮宇清舉皓  
首兮吾奚以屏營

### 垂綸亭辭

爲宋誠  
父作

漢滔滔兮日傾東滄浪兮泠泠蹇一士兮沈冥垂苴鍼兮  
不屑以晷明玕兮貝宮朱蔚兮青蔥魚戢鱗以爲衛兮龍  
騰章以屏氣謝媚媿之嘗巧兮口垂沫以縱恣吾寧養之  
以歲年兮寶祕鬱而不宣豈直鉤以違眾兮守釣道之自

清容集卷二  
然時至而迅舉兮匪荒習之詭誘保貞志以遂初兮考銘  
言于耆叟世俗眇其莫同兮永訖依夫前聖之所究

巨峰辭為吳成季作

千嶂兮嶽崑特峯挺兮絕垠泉交流兮織文粲霄臺兮鱗  
鱗檜節兮松纛接路兮以遨儼至人兮清寥休德新兮日  
昭神曾舉兮重元大帝儼兮授簡以宣曰渾沌其無迹兮  
孰為之傳氣積兮九乾五緯從兮右旋逆知來兮順以往  
握靈機兮測天狀葆正命兮滅企妄受帝語兮還神京山  
之下兮雲亭亭澹獨樂兮復丁則泰始兮道甫成

雲中辭

氣茫忽兮孰窮其升淵迴旋兮挾以騰圓為輪兮直者繩  
握斂散兮莫名山之椒兮日暎彼獨黯兮上屯從豐隆兮  
駿奔需不進兮惜惜下土兮垢氛靈夷猶兮曷存烟余視  
兮屏息桂酒酌兮瑤席法元化兮以康食神功脗兮奚以  
跡眾甫集兮粹精愴將逝兮廓清

春雨辭

元陰固兮內凝滄蒼蔚兮溟沐興注兮建瓴疾兮灑兵下  
土兮沃焦響徜徉兮紫霄來弗以趾兮去莫可招澹幽士  
兮空山息視聽兮玉顏帝青廓兮籟沈虛牝泪兮潺湲謂  
彼有聲兮耳益以聵疑不釋兮詢于大塊

義婦辭東平孫珪妻盧氏

彼棖煌煌兮過者式之黯予心之初兮孰或測之紡兮于



房伊雛孔傷饋兮于堂我姑永望余不聊生兮矢神告之  
歲月遷流兮卒乃復之鸞鏘兮飛鶴松柏茂兮朝露沐石  
可泐兮志莫虧儼舜英兮介壽祺

哀蘭操

盱江吳允文咸淳末與家君同佐江東幕府允文慷  
慨喜論功業倚青溪檻張髯頓足籌邊事歷歷在口  
傲視府公每一至賓次席甫坐卽去督府舟抵龍灣  
金陵郡文武郊迎謁入皆謝不納獨允文立江亭掩  
袂大慟必求見始退未幾以王宮教授召方是時江  
淮幕府僚佐言性命道德者悉詭號爲知兵得入朝  
言事而允文疇昔素論兵尤奇偉可聽故得驟遷爲

起居郎復直舍人院流離南方寓虔州時文丞相總  
兵兵浸弱允文復以平時論兵丞相獨傾下之兵日  
迫丞相酒酣與允文論生死允文未及答丞相呼軍  
校斬之噫允文要爲奇男子其未答也抑將有所爲  
也柄九歲時嘗拜允文於家君坐上想其風采凜凜  
猶有生氣今觀所作墨蘭不自知其悲之無從也作  
哀蘭操以矢之暇日當弄絃繹聲以配易水之悲壯  
幽蘭兮秋風爛命兮不逢剡剡兮素蕤零露裊兮莫持望  
崇岡兮不得返悵江南兮愈遠叢棘兮茈茈欲駕兮無轅  
子中野兮屏營芳隕失兮玉零謂我爲非兮吾何辭已兮  
已兮其將何之幽蘭兮勿悲生失據兮死有期思夫君兮

意極從逆化兮何噫

蘭竹操爲子昂作

柔者不卑剛者不凌質質雪霜心兮以寧且清噫招過學  
恭吾曷敢以從

彼高者矧彼俯者磧各全以生不媚奚慝尋不可以枉寸  
能有所長亦獨何心茲奚以傷

芟芟兮叢棘高者下兮曲者直揚靈兮靡惜介石兮誰瀆  
功成者去兮孰尸其榮辱爲佩兮弗忍以刈爲杖兮弗忍  
以戕杖弗以扶危佩弗以服香其咎曷當履維德基其無  
缺以自隳噫

黃可玉哀辭

孔子敘逸民所向不同愛其近道吁是有感於世也耶又  
曰不得中行必也狂狷乎狷者有所不取矣剛絜養正矯  
矯然離垢立奇語益不合行日以褊若是者誠不取矣苟  
爲之不能知知之而自警者得一人焉曰南康黃先生可  
玉可玉名石翁世儒家居廬山下少多疾父母強使爲道  
士讀聖人書能知其心謂道與言不可以有行也必藏智  
頽放以自養約結制行非介以爲異也其著書極於憂患  
者困之通也嘗曰曼容誇節支離不能也平世易足吾何  
爲乎是空巖隱穴廓然契領至則曰游聲養名非士之實  
跂而望之去聖逾遠故其所爲詩文靜而不馳溢于哀忿  
則可玉自號之曰狷叟者其果知矣可玉所居室多唐宋

雜蹟間疾作閉戶反復在手疾止危坐若思客至馳辨榮辱可玉閉目不復答而人始咎之嘗與余言吾鄉善醫曰劉開能已奇疾里人病噎嘔藥不愈劉往視之云廬山某日雲氣開君憑軒眺引之當愈後卒如其言余少固多疾今疾益劇不知用劉治法可已否相視大笑余來京師報書言茅山陶公黃庭出可急購購成當同議中黃畢法未幾竟以疾死嗚呼可玉言幾六十死矣曷哀也已學老子道志於壽余不志爾謂其世無似而哀者亦介之的也伯玉砥礪志節歲久益漚讀其自爲銘知可哀也已故爲作哀辭辭曰

朱光絜精受昭質兮煜煜靈根曷幽鬱兮鈎深索奇儼古聖兮德充以尊履制行兮卹彼拱璧奠皇圖兮劌以爲隅眾引誣兮响俞突梯道之非兮挾輶以行慎樞機兮層冰在蹊踐其絜兮幽蘭允芳誠不敢裂兮清元返真氣始升兮謝彼苑濁超變騰兮空山闕虛蕙烝殺兮渰焉白雲從我招兮

林彥栗哀辭

道家言黜聰明去健羨形神始完是果爲得道耶古者上壽百二十歲竊不死之說者則曰脩之益真其道彌親壽而無德與名君子恥之故脩短有命遺壽焉猶可言也名德不至其漸盡腐滅又安所取哉古之人若是者眾矣永嘉林寬字彥栗形癯而器溫其於學也汲汲然逐日以補

有不足焉則力揆簡冊以自證其爲文必達於理而始精  
於詞謂詞者載理之具也理不足焉詞雖精無益也淡思  
以求之旁取傳記之說勦絕傳會據宗統原以會于一復  
懼其未盡是也則祕重自念將周游四方闕疑廣聞目擊  
而心領焉噫若可謂勤也矣道散於九流百家彌綸者至  
矣其弊有不勝言者汎濫俚雜尸坐矐目漸入於無聞之  
傳余嘗察彥栗知其心有淡憂者焉余始見於姑蘇氣和  
以謙再見于京師愀然以思取士之道非一嚴畛域析毫  
髮有司者之過遺逸不舉則凡吾徒在官者誠有罪矣彥  
栗志不在是推彥栗之志在問學爲之而不克就若是者  
是真有命矣悲夫延祐六年三月卒于京師年十有

其弟宇友謹哭曰吾必奉喪歸姑蘇姑蘇吾先人所藏遂  
爲之辭以申其哀焉辭曰  
氣清明兮受元陽德彌中兮闇以章挈太古兮儼九皇播  
絜精兮瓊圃芳力未具兮志則專一葦渺兮濟巨川慨不  
進兮道遠邈白晝速兮陰風旋數實紀兮吾何愆路孔脩  
兮神獨還靈旒翻兮木葉丹儼夫人兮在空山玉蓉冠兮  
紫佩蘭

元教大宗師返真朝元歌九章以前導

雲飄飄丹臺何岌巖堯中有授經之老顏不彫三光盪摩四  
時代謝神來歸靈承帝罔敢替  
謁珠庭

寥陽空洞六聖儼思九垓熙春羣黎受禧昔騰章聞闔通

金書儼在水旱功

朝重華

五嶽奠形飛車揚鈴翔鸞騰晃金精下視垢濁何沈冥昔  
者之來運有遭今者之往清且邀

神虞娛

匪衢以乘匪車以征蓋葺兮摩旌洞簫激兮泠泠磅礴一  
氣兮冥冥精思道樞兮跪頰聆

元雲駝

玉几差差文織成龍章鳳翥相緯經大言鴻濛小言毫銖  
道在瓦礫匪別區念昔人世我非娛

啟圖籥

煌煌文成厥允嗣昌靈之紹合永貞陟降四紀心兢兢視  
彼成虧凜春冰高朗脫屣辭世榮

靈胄光

簡兮無言默兮若存生以不生為根死以不死為門絕學  
丕傳黜其知聞五千之言世永傳

握重元

熙洽休明紫蕤朱英侍帝左右壽考寧啟祐元緒何繩繩

嗣昭代歲無害佩鏘鳴兮衣綵繒

昌期運

高維松層岩岩斂玉顏養金膏鍊形以昇朝帝青周流萬  
變鎮神京

佳城高

清容居士集卷第二



傅踵舉

正獻淳熙辛丑登第少傅次舉于鄉衛公夜夢神告曰汝子宜遲上南省甲辰闈郡被黜淳熙丁未

中丙科三歲

復師以研繫我族父昭穆會稽非宗疇譜同

源迢迢宴堂是敘

少傅挽正獻詩曰宴堂聯族子講說後諸生

相臣嫉忠同黨

同錮

韓侂胄擅權正獻以太學正罷入偽學少傅以論蘇師且亦廢

正學勃興象山武夷

相繼登朝奉常羽儀維我少傅抱其魁奇曰經武有本日

用不疲絕幣罷書感勵孜孜迺登東觀迺佐宰司歲為闈

茂正肅冠廷

嘉定甲戌正肅進士第一正獻祕監兼祭酒當是時越公為祕丞兼樞密院檢詳越公登

第已二

正獻休休少傅繩繩載史纂謨致事以行少傅作

程均羸紀經翼翼京邑十載救寧憬彼介狄迴戈指淮鐵

駟脰喧為厲之階公在宥密展誠弼諧悉卒宵征拉其妖

靈總戎輔京秉燾受齊

李全叛以同知樞密院浙西制置使

姦沈于淵公歸

在里徵彼壽俊縣車告止

于時徵公及東陽葛公參政宣公皆不至三公年皆近八十矣

三啟公府永楚賜履復荒于齊終越以祀冢子廬陵克謹

其承曰惟瑞安儉不近名生我俊兄志學蜚英上試銓曹

計偕薦膺余年尚孩企焉戰兢女紀既蒙訖籙更符匪曰

愚智阨窮同塗火焚高閣戚戚告瘖不敏其芸莫植其居

泯奄長夜盡然永徂念子之稚孔蕤孔朗不寧以餽俾游

沈荒我雖異途與汝同情無為夸淫無溺燕朋壹爾氣神

履冰奉盈我宗匪微德芬匪沫來者之榮逝者之戒沾沾

懷新不究其敗鑒彼太素曷其有壞述我祖德送爾言邁

匪窮咏歌申以用誠

張孝子

汴張元綱之父爲南陽屯丞母卒焉葬於府之南灘  
元綱痛不得復于里銜悲茹辛縮板負土崇爲堂形  
尺以二十周廣之度十有二尋屹然而嵬望然而臺  
發以陶甃堅靚慎密構亭于中以庥其神屏傭役躬  
畚築謂鞠育之義由已而始盡於是暮年迺成河南  
田君秀摭事徵實謂梅俾有述詩曰

粵若古先巢穴奠居齋齋其仁誥誥其愚返真元正精糜  
魄枯如蛻斯登如轂斯哺後王後民百刁具師顧瞻本初  
寧不爾思蘩裡蓬穎惕焉表微歲月旣遷孰封以機窮悃  
恣華輟泣而夸力殫於民禮廢于家千夫丁丁逞巧莫譁  
風淫雨饗卒爲泥沙嗟嗟小子內省是嗣維張孝子無貨

財是恃無奔走是俾宰如嶼如惟手拮据夕號其陰朝升  
其墟我心匪墜我力匪痛焦肺渴肝翳翳慈顏曰天有命  
茲土是虔宛彼飛鳥亦集于原隱而卒之有阜孔堅魂麻  
于所不畏不侮汴水湯湯其流匪沮孤征云邁入此室處  
申以顯之以詔爾永慕

徐母表閭

大名徐夫人以節名于夫宗晚居錢塘有詔表閭江  
南於是其子大夫公執憲東浙食豐享榮侈且至矣  
廣彤管之懿傳青簡之信春容整嚴執筆林立四明  
袁梅廣爲頌詩以備邇人之採詩曰

婦道貴柔厥義彌剛柔以內施剛以外防煜煜秀芝空林



清容集卷三  
四百三十  
自持永辭春榮三秀何虧維魏徐母玉雪其躬端操靜閒  
凜焉高風念昔惇惇黃鵠孔悲婉彼孤雛不能奮飛春條  
其桑秋勤其穡聿懷深憂世德靡忒漢嫠張芝歛卻駙馬  
黃髮棱棱高秀里社蜀女周度斷髮表心矢言堅石厲躬  
鍛金沛有桓女少名其宗援刀割耳之死莫從繫此三祭  
代表其閭垂裕莫聞靖言長吁桓桓大夫退食自公擊鮮  
具甘是宴是崇勗哉大夫教忠于朝養和服寬慈令孔昭  
四海晏清士節莫著歸爲闡範陰教是助雙闕峩峩天澤  
所表維夫人節維大夫孝我庸孔勤亦莫我敢效歌此擇  
辭永言申之過者必容四方其訓之

致樂堂

爲鄱陽周南翁作

有巖周門寢宇孔齊溫其碩容西南有闈爰琢璧楹爾養  
爾承慎而絜清以燠以明維大夫母柔恭俾壽嗟余季來  
教言孔懋木之彬彬視其同根有滄者雲孰躋而升伯也  
于房仲氏中唐先子之淑翁焉以光我堂如跂我懷靡止  
載車以行不踈不倚周京斯弁旨甘有衍匪旨甘則怡樂  
且靡違彼堂在阿樹松峩峩黃髮番番童舞婆娑于以樂  
康於焉作歌

臺氏舞衣堂

彼崇者堂白雲中央蒼蒼維松舒泉湯湯有矜孔碩有醪  
孔芳差池東西率祖以行令德允修不震不侮孫曰吾祖  
祖曰吾父服其斑斕式歌且舞飲以大瓢爰擊其缶維咏

維猶垂手以招有髮者髦彼雛天天永祈黃耆福祿宣昭  
左右承翼見其二毛厥居安矣亦既完矣樂時永清俾庶  
俾蕃肄其幼儀雝雝桓桓宜爾雜服終焉考槃

古詩 五言

舟中雜詠十首

好花避車塵飛入黃河洗河流政茫茫一去不得底納汙  
有至道胡爲愛清泚念茲物理深元籥從此啟  
飛雁翔南雲避就端有得舊年春風歸雪花大如席陰陽  
眇難窺造物司其職慎勿事炎涼來往任行役  
道逢射生船有鶴馴且懼青絲閉其目病翼寒蕭踈皋禽  
九天來此豈真吾徒獨憐羽毛似盤桓爲長吁

家奴拾枯草走兔來相親生來不識兔卻立驚其神行人  
笑彼拙歸來始嘖呻乃知特幸脫未信吾奴仁

白葦生寒沙殘花搖敝帚燕都百萬家借爾作薪樵物微  
生最下功用迺堪取大勝桃李花矜矜鬪妍醜

清夜視北斗正色搖我前迺知中州殊譊譊浪談天召公  
化南國美教來自燕乾坤儻一致地氣何由偏

紙鳶帖晴空飛輪走盤線東風恣昂藏得意隨手轉攀雲  
政相喜墮地忽復怨兒童豈知此得失終戀戀

惡馬少駕車驚馬多駕船駕船勿戚戚駕車何翩翩渠命  
有通塞誰能別媿妍君看鹽車下淚隕如奔泉

春菘種北土三年變蔓菁一爲居養移自覺顏無情南山

清客集卷三  
五  
四百五十一  
植松苗淡根定生苓千年化璧魄豈比春菘榮  
鷓鴣漾晴空意態極楚楚翻風蒼雪迴轉日爛銀舞盤旋  
傲飛鴻清遠敵凡羽須臾下魚陂愧我覺疾去

車行二十八韻

乘車古云貴此意昔空羨河流露枯沙桑本接晴甸大車  
蓬蓬前小車麟麟殿高緣縮先登卻立駭所見隆如龜戴  
殼縛如蠶裹繭效駕何昂昂帖耳復戀戀高岡互回伏遠  
樹時隱見禪趺恣掀簸尸寢作瞑眩初疑肝膽傾漸覺手  
足顛兩耳傳鳴雷雙眸瞥飛電縈迴蟻旋磨局促蟲負版  
氣奔驚七還心嘔復三咽地軸從此翻日輪可同轉軒輞  
怒交撞戚速急欲戰馬悲望雲嘶牛走見月喘惡筆恣調

伏詈語極鄙賤中宵不知勞亭午輒告倦揩摩髀消肉舍  
弃足成趺蕭慙朝飧薄重勝春醒酒土霧散游絲沙塵起  
飛麩咫尺方欲離頃刻已莫辨素衣緇漸化元髮白新變  
人言道途苦我意舟楫便雍容漸追昔麗縛時想緬輓輪  
貴尊賢下足表置傳曳柴清時羞高蓋羣牧選况茲軌轍  
同及此寰宇徧詩成記勞勩旅次時慰唁

餞王參議以風帆目力短江空歲年晚爲韻

澄觀學求道八景雲青紅上畏羲娥流鞭霆跨追風相知  
不在貌相見誰爲容持此金石心坐閱寒暑中  
昂昂萬斛舟浩蕩揚雲繆好風助其端瞬息千里颿層波  
激飛雪正色令愈嚴均堂覆楮水止足拘庸凡

昔年九方皋相馬不以目想其遺元黃神氣洞馬腹東方  
有一士被髮羹不肉居然使之來不復困邊幅

浮榮一羽輕至道萬鈞力達人固靈根清靜執寧極淒涼  
江海念別至勿戚戚空餘好賢心一矢貫千的

魯聖勤經綸坐席常不暖事來非其意稅冕或恨晚每懷  
千歲憂百歲常苦短扣牛有真理短褐歌石爛

機心起風雨平陸能成江苟非養其恬事至誰能降此心  
皦明月爽氣通八窗長空掃林莽寒飈助春撞

銅羹有至味易牙敢加豐醯鹽強調適眾口終難同澹泊  
本真情清淳豈纖容一朝饗帝所祥雲藹晴空

文章工世姝此道非真詣有如東家施捧心學天麗公文

雲雷尊落筆卽千歲斐几生晴漪三沐古錦藉

平居挽士意寶鏡懸秋天清影閱今古寒光萃蚩妍淒涼  
塵土姿朗鑒勞評銓相親耿無語相期欲忘年

雛鳳棲桐枝清音起沖遠英英異羣羽秀色日以婉詩書  
有真託我輩同一莞溪根在永闕衝霄未云晚

次韻虞伯生夜坐

炎晶爍草露木末望西顛靜躁誰爲尸翕忽紛寸抱志士  
法天運炳燭不在老羣經固其郭積神以爲寶陋彼多言  
生希名太元草山林詎心違歲月付幽討擾擾徒爲名努  
力在此道

地氣環中州橐籥均宇內中宵炎溽頻露坐猶憤憤遠窮

太古雪欲往終有徠馳神極寥廓我筆不可載棲形竹素  
園萬化等歷塊相期江湖淡慎勿寒暑礙秋風起天末紉  
蘭結幽佩

次韻伯生

弱冠事墳典里曲譏涼涼螢爝不勝火矧敢扶朝光驅車  
出門交一粲逢清揚疊尊實元酒至饗不在觴慎勿飲世  
人徒令攬空腸紛綸五經學遠祖遺仲翔知賢恨已晚相  
見復慨慷

至道縣日月無言炳陽秋辟世端有方低昂少淹留汲古  
理修綆寒泉漾清流永懷魯兩生議禮終秉周我言失造  
次燥吻譚郊丘此悔行已止歸田賦宜休空餘六籍意歲

晚期冥揆

再次韻伯生兼簡仲章二首

重柳積清潤曉日疑蒼涼萬化同一氣斯須變朱光夙志  
尚幽隱清夢時悠揚愧非酒中聖客至同覆觴委心理縑  
簡念至迴中腸時節忽已迅秋雲雁南翔相期慎素業載  
歌慨以慷

俗士同酷暑可人似清秋邂逅得二子傾心爲渠畱相望  
塵隕霧相親汗交流積雨暗京國苔痕生道周神交徑心  
醉何必登糟丘著書君已定彈冠我當休唯餘舊詩律支  
頤費雕揆

伯生詩律清遠少與之比嗟歎不足復次韻二首

皎皎明月裾美製異厖涼薄游起嘉譽妙選歸明光濡毫  
百王度麗思方抽揚澡身佩璜琚慎德銘豆觴蕭艾不竝  
處三嗅懷剛腸永愧斥鷃姿側身廁鵬翔終然願胥附竭  
誠以慨慷

元鶴警清露遠思凌高秋長松有佳蔭嘖然爲之留譬彼  
明月光那能染黃流洋洋日以往天風迴不周畏此颯爽  
涼行當返浮丘同憂有奇士詩來賦歸休遺經倘可理墜  
緒期旁揆

鞭馬圖

爲狄誠  
父作

生駒萬里意所向知無前圉人忌其德未試先加鞭要令  
俛首馴使我常相憐伯樂死已久此道不復傳駕車困泥

塗伏櫪老歲年所用非所養誰能別蚩妍畫師逐時好謂  
爾誠當然披圖重歎嗟我意何由宣

張希孟嘉慶圖

其祖伯祖皆  
年過九十

舜泉清且甘厖山秀而朗淳風邈泠泠舊俗遺穰穰怡愉  
二老歡敦厖百歲長銀光浮勝頰素髮垂過項階庭尊孝  
謹閭里化廉讓春風連理枝晴日九節杖犢車共東西漁  
舫同上下蠶麻課餘閒豚韭隨薄養薇山悲首陽菊潭陋  
胡廣愧彼非禮羅居然嬰世網孫枝孕天葩祖風躡遺響  
含飴記疇昔興門慰期獎冥鴻天機韜喬松白雲往緬焉  
清風佳庶作高山仰

遊長春宮分韻得萊字

珠宮敞殊界積構中天臺神清厯倒景青紅隱蓬萊羣山  
助其雄袞袞從西來八荒昔禹甸爲此增崔嵬舊邑環蟻  
垤清泉覆流盃雲低落日淨莽蒼同飛埃緬懷古仙伯采  
芝雪絜總長春豈酒國殺氣爲之迴天風起高寒玉珮聲  
徘徊空餘水中輪厯錄環春雷之人去已久松聲有餘哀  
次韻徐志友雜詠十首師川樞密  
五世孫  
喬木空雪霜孤枿存十一遺聞備家乘零落寧有述文勝  
理固然相道返初質志士心未降黽勉終惜日  
刻志非不工畏修迺真怠勞生悟其機靜默希遠害棄觚  
強浮湛念至時永慨佳人在空谷不復夸絕代  
嘉賓秩初筵至饗不在酒傷哉囚飲徒醉日恣可不獨弦

不成音短袂莫回肘恃此百尺臺誰復憂蟻朽  
至道存遺音我琴不堪撫愛此素心人更僕請遽數文章  
有正律短計工百沮寡言徒自高憂熏汗如雨  
盈盈道間花秀色爭餘春舉俗競愛之孤芳愧陳人譬彼  
鏡中月照影終有塵八荒已同雲客行復踈踈  
玩易悲三陳微服志已迫胡爲守其恬正色養神宅迺知  
無邪詩經緯貫三百載籍天所扶終古脫五厄  
古來操縵功時至能安絃近復顛倒之擊石求飛煙峩冠  
儼尸坐委蛇養修年廢此汗簡勞謂可一唯傳  
談經各戶牖正道誰當承朝菌不知朔夏蟲復疑冰高堂  
屹崇構相彼甌與瓠師門有遺訓此語非吾能

豫章古詩法萬折江海偉層波激奇觀妙用安可幾安語  
非不能萎蕪乃氣累東湖有真傳廊廟振朱屣  
天風眇東南碧雲澹凝戀嗜芟同苦心相得不在見黃塵  
各道里玉雪起清遠它年有飛鴻爲我繫書箭

再次韻答仲章仲寶十首

東南有奇觀萬戶粲如一覽古幽思澹擬筆追七述芳澤  
同聚塵清淨葆昭質所憂不可言凝睇悲落日  
良苗沒深蕪稽人志其怠無端揚飛塵螟蚤賈澹害力耕  
未逢年歲晚空永慨淡悲采芝士卻穀全季代  
春雲倚春山搖蕩如春酒相親在顏色念子心獨不薄飯  
時充腸短袖不掩肘高樓政清歌盈盈自芳朽

驅車學遠游古劍終夜撫長安袂成雲我去何足數相知  
有奇士不畏道里沮寒風振枯林落葉起清雨

西山鬱佳氣萬古留青春負露巖壑姿邀彼車上人之人  
有行役莫浣車中塵空餘白玉泉隨車走跋跋

長松養華滋陋彼霜霰迫虬枝結層陰下庇十畝宅擾擾  
區中人生歲寧滿百慎勿以智夸相逢復相厄

新月無定姿低昂起初弦南飛有孤雁驚沙度疎煙一爲  
居養移來往忘歲年感物非不多音書爲誰傳

束髮交老蒼道大誰能承澄心養真源寒泉護清冰傷哉  
注巧勞欲作千金瓠豈無須臾好陶人愧非能

淵明仕浮湛投劾志始偉愛此松菊佳餘年悵無幾八表



雲鶴還不作身後累陶然且就飲軒冕真弊屣

我家古城南喬木起清戀空江納雲影清夢時一見相逢  
故人淡各念居止遠他年東南來贈君以竹箭

三次韻酬周儀之虞伯生十首

英英雲中君含思歌太一迴鸞舞天葩流粲杳莫述報之  
不成章玉雪耿素質臨風發長謠庸以永今日  
昔學空巖君之人怒其怠哀猿雜山狷驚嘯欲我害天隱  
神所藏別之空悵慨桃源闕溪竇亦復知晉代  
道逢學仙人御氣不飲酒我笑初無言彼已嗔我不哀哉  
守其愚繫石猶在肘冥化隨悲風淪淪骨成朽  
遠客思故園孤松爲誰撫露白天宇清鴻歸暮雲數誓將

畢幽討勿爲此游沮念子知我淡神交泣天雨  
楚歌惜白日燕歌蕩青春哀樂自逐時流习區中人我生  
功名念素領無纖塵飛鳶竟跼跼啄雀徒踈踈  
羲娥挾雙輶冉冉老見迫丹臺漱靈霞瓊蕊生尺宅控搏  
無須與詭习已千百慎此陰陽機逃虛脫真厄  
奇樹生南薰清坐彈五弦淳風邈永古白雲赴蒼煙世故  
日以媮俛仰隨歲年折腰倘爲酒猶足青簡傳  
破瓿居井眉勺水不得承寒棹轉餘瀝天風助爲冰舊質  
儼有在誰言真破瓿愧彼埏埴功成壞非汝能  
龔生天天年苦節亦良偉輪囷閱書傳此事寧有幾口腹  
非過謀形骸迺真累所以商山翁終復著漢屣

少年恣青春歡至無復戀一爲關河行常恐不得見新雁  
雲中來飛飛落南遠歸心耿無寐寒更促浮箭

題汴梁推官周子明三獄詩卷

三章結漢網清淨歌元元後世益以密姦悞日云繁治法  
如理絲眾勞政多端一絲不得直萬緒何由完虛心納眾  
口至理藏片言永念死者哀更推生者冤汴州古循吏三  
獄成平反天道詎幽遠于公有高門

題弋陽巖山精舍圖

紅塵落青山飛瀑遠洗之孕此巖中居寒膏漾淪漪白雲  
偉衣冠修松古鬚眉書聲出虛牝杳杳空中篋桃源有神  
界天光固幽機一爲漁父游妙筆工研窺至今武陵郡山

水傳清暉

次韻仲章蔡村阻風

足弱辭北騎身輕落南航懷別意濕澆問俗心悠揚豚豕  
供歲歉蠶麥扶時康幽事不滿眼薄念時迴腸天風進蕭  
蕭海日懸涼涼喧唳土囊裂悵羨雲帆翔眾樹失高下老  
鶴追微茫而我獨偈仄與子同阻長靜退實守道躁趨迺  
捐常愛此金石貞詎爲道里忙相從果無悔後會誰當忘

次韻陳畬齋七首

明月明年何處看爲韻

秋月如靜士炳然河漢明白雲護其清迸作飛空瓊此月  
不受彩卻行印中庭白雲忽不見我思徒英英

靈魄表空輪隨陽產金玦須臾白璧成盈盈懼顛越陰陽

清容集卷三  
三  
環無端變化終未歇獨恨今時人相忘舊時月  
人言月有桂天風墮微馨開軒睇扶疎西與銀河傾桂本  
空中塵那能助虧盈朗鑒自終古匪待今夕明  
舊年客清秋望月如望年長身兀孤影哀鴻起清圓落葉  
墮我後北斗戴我前勞生果有役念至心懸懸  
海觀濯銀雪金精融太和照我身上衣光耀何其多感此  
萬里意逝將飲叵何叵何豈真樂臨風託長歌  
暝樹迴朝光驚鳥不知處羣動俱念安客行有程度熠燿  
驚宵征熒熒化餘腐豈不畏跋履眠食在謹護  
殘醒強清坐朔風生樹端客袂何皎皎客扇何團團念此  
會合意永與明月看他年返舊壑願比青松完

蔣商卿敘其先人客金陵與先子事契末章復以

見屬次韻

堂堂金陵州草草石臺路羽書急星馳鋒車卻金錯飛雲  
古戍基積雪寒沙步我舟欲輕行我馬何踟顧乃翁入門  
初此夕傾蓋故寒暄謝浮語信宿陳薄具茲年心尙孩維  
時歲云暮艱虞脫九死邂逅欣再遇貞姿固青松雅曲廢  
朱鷺二老古先民百歲等童孺微痾隔音容鉅痛割心腑  
孤根擢遺肄淳嘏悲弱羽緬懷青瓊舊力守韋編素伊優  
笑侏儒咕囁陋章句珥貂匪七葉插架同四庫談空齊諧  
虛守樸燕說固芳林極蒼蔚溟海窮混濩迺知山中雲政  
異巖下趣心聲要成律易象那可註羣賢凜無幾餘子兢

自數愛君思如泉愛君美如瓠願爲汪汪淡勿作翁翁附  
巨構千礎承珍裘百狐聚混世同舖糟勞生已嘗醋整冠  
儼初服拂衣謝紛務溝斷寧繪犧戶樞詎爲蝨情淡盡傾  
倒醉劇多謬誤忘機絕矜絜落筆化塵腐水深嘉魚潛雲  
重樛木怒翩翩林間鶴栖栖井中鮒飄零記疇昔慷慨合  
和煦辱贈難與酬臨風復成賦

集廉園

芳菲廉家園換我塵中春古樹不受采白雲爲之賓中列  
萬寶枝天娜瑤池神背立飲清露耿耿猩紅新幽蜂集佳  
吹炯鷺搖精銀層臺團松蓋其下疑有人弈罷忽仙去飛  
花點枰茵高藤水蒼佩再摘誰爲紉濯纓及吾足照暎須

眉真暝色起孤鳥寒光蕩青蘋信美非故居整馬來城闔

次韻仲章杜門

今日慵出門尸坐觀我生忽有故園思寫之不成聲舍北  
兩朱櫻翠羽垂流纓舍南青桐樹亭亭如蓋傾念此永契  
闊爲爾增拂嬰歸雲跂西山臨風意縱橫

暮歸

馬鳴千柳昏犬吠一星出晴空暗歸道客子塵滿骨入門  
視疎燈隱若眼中物展書弗能誦浩氣彌碑兀古來惜陰  
士志有不黔突愧我非等倫顧影竦毛髮寒風肅羣動勁  
氣激清樾飢鳥念其安驚噪落林月迺知造化理壤壤殊  
未歇

贈黃教授歸閩中

壺山東銀筆秀色倚車蓋其人清且明十室九冠帶林鄭  
陳方劉祥雲布卿靄緬惟乾淳初朝野實交泰執耳爲之  
盟多士森弁會澄懷味蘭芷正色炳著蔡彌綸古編簡粲  
錯列文貝百川已東流末派擁溝澮飛霜隕喬木變脫等  
蟬蛻艱難老文學世德芬未沫布袍黑嶙峋慘澹萬里外  
希音繹風雅一鼓瘖萬籟宛彼孤飛鴻鳴聲何噦噦飢來  
念其安飲啄欣有賴涼風振修衢肅肅返征旆懷賢不成  
章因之結長嘅

送許世茂歸武昌二首

其祖慶元大魁  
先公嘗與同朝

岷江下奔流日夜東南趨艱虞六十載蜀客無完居纖修

挂晴練五老爲之廬招彼素心人蒼翠垂流珠峨峨銀臺  
公懷寶耿未攄青桐擢孫枝下此佳鳳雛絢爛五采翼披  
霞表亨衢清音冥鴻遠逸興蒼鷹俱食竹戀苦志餐風養  
真腴誓將八極周覽德爲貞符歲月諒有盡雲端復躊躇  
躊躇固吾事荏苒悲征途

蒼莽鸚鵡洲日落楓葉赤昂昂處士恨蔓草化爲碧之士  
輕且儇之人何急窄至今千載下投筆弄鋒鏑銀城太古  
雪轉首一消釋雍容詩書郎浩氣裂金石裴回登臨意寒  
波靜如席相逢各萬里末契論宿昔呶嘔語未盡征雁起  
暝色淒涼衣冠聚山海窮畢弋翳翳桑榆光人物眇可識  
停驂望前坡去馬記初驛

題金華洞圖二首

巍巍靈居秀遙岑擁頰霞聞昔受道時三洞爲其家金精  
裂飛魄躡武陵青華遺彼一寸松樛柯養真芽瞬息服光  
景神丹起槎牙下有千歲詣百靈靜無譁此豈甚祕之服  
食世所夸真凡路永隔輕生竟如麻

其二

五嶽扶神州葛稚川地記言金華能避澤水之患泝水胡爲魚茲山鎮無極  
不竦復不渝靜閱浩劫理兩曜跳元珠矯首二皇君寶冠  
白雲輿方瞳駐真盼濁垢紛何如霏煙聳空翠滴露凝流  
蘇神鈞合虛牝松聲自笙竽窈兮忽不見諒此寧非居

送張上卿燎黃上塚

素質超昆侖瓊胎孕崆峒指木爲我母問元爲我翁承暉  
企春榮百歲如捕風朝暎何朗耀莫景何葱蘢返真紫虛  
臺合歡朱陵宮迴鸞從舞鳳景命來圓穹妙感非世窺揚  
靈愴無蹤湛兮合冥會道一爲之宗沈沈白雲闕雙鶴鳴  
青松念此不得見悒焉遲相從

壽何平章二首

方壺屹祥觀髮彼綠髮仙執簡朝帝居高演清淨言雲爲  
八表雨水作四瀆泉炳文一以施握之不盈拳頰首陳至  
詞囊括希其全成虧匪至理願言葆真元  
琅琅黃石書功成迺言去豈不思濟時默焉念其素山中  
赤松柯云是童所樹長養媚以淡屈曲美無度神光滿澗

谷希夷澹無慮願持一觴言眉壽在謹護

次韻雜詩五首

有客一馬歸屋角羣星明念此惜日苦羲輪何西傾粲粲  
風中花弱豔夸芳榮而我獨枯槁欲學身後名

少年觀滄海天濤碧因依下有珊瑚株紅光射雲輝玩之  
不忍舍歛吸雙龍飛遠爲塵中游坐覺顏色違哀哉西山  
士飢食周原薇

昔狂愛奇士接席多大言中道邂逅之捐生誓俱存傾家  
謝其意酒至絕不論此士今已矣長年常閉門  
幽居集奇觀積雪明寢扉湛湛新陽舒寒光騁熹微呶嚶  
南歸雁長鳴示其機出處諒有素觴來爲之揮

朝游東門曲壞道荆棘存纍纍者誰豕舉觴醉其魂死無  
落魄名生有咕喋言所以荷蓀翁臨流漱潺湲遺簪隱世  
德忍垢躬灌園豈忘輕肥念苟得誠少恩采采松上花飢  
來助吾餐

壽程內翰二首

蕩蕩長壽居丹梯峻蒼旻中有龜鶴所老仙爲之馴維時  
夏初至園林綠蓊蓊萬神峩冠環參差揚七均行雲鎮清  
樾靈波激層津振衣游帝青下土何其塵運與千歲期正  
色光景新無爲理清淨世儒汨其真君子法簡易坐致羲  
黃淳

車蓋交道周嘉醕盎在房有客東南來高歌奉清觴一歌

清客集卷三  
三百八十二  
白日還再歌青春揚師曠世固有八音盪翱翔迴鳳下奇  
雲倚桐非故岡覽之不食實三嗅遺孤芳皎皎金石姿令  
德豫且康窮河覩崑山出日賓扶桑介此黃髮期因之結  
成章

別仲章

飄飄貢公綦遠乃至關河關河冰爲天積雪流銀沙前有  
林間烏後有馬上笳烏啼思我親笳鳴思我家川流去不  
息羣山赴嗟哉余行已東南朝醺散微霞念茲日不見持  
觴酌餘嗟

別吳養浩十首

以願爲江海淡勿  
作盆盎淺爲韻

弧矢懸高門卓犖四海願登車透且遲永念道里遠雞鳴

當宵行執轡上長坂西北何其高飛雲列奇觀  
游神竹素園古聖儼若思至道篤靜極執簡欲受之上有  
奇耦文摩盪光離離持以禦魑魅魑魅不敢爲  
維東匯爲湖浩漾通三江懷哉紫芝叟月明漱飛淙小言  
諒以清大言淳且厖去去日未遠奔流鼓春撞  
昔聞方壺居誓欲往滄海操舟迅前邁雲雨白皚皚層瀾  
眇空洞肉翅不可待朝陽漱靈霞一食毛髮改  
古有無媒女閉門泣春淡手擲雲錦梭流光耀晴陰千葩  
翠交結宛轉不可尋浮雲爲之佇幽凰爲之吟  
昌歎懷古辛在德不在物屈曲寒澗底詎以險自屈有客  
同嗜之至享寧勿勿芳年匪淹畱薄采消永鬱



雲和高岡桐龍腹裂冰雹攫之淳且淡謾謾震寥廊彈者  
不復語往者誰可作元雲浮陰來開戶失雙鶴

緜山仙人居上有玉女盆解髮三沐之清冰盪寒紋神膏  
釋翠縷跪坐晞朝暎蟬蛻有變化蟪蛄安足論

客來南榮下欣言酌醞盎觴舉壺已空盤辟復三讓享之  
不成章何以爲客貺客言君當休商聲助予悵

草茂木萋萋水勁石翦翦相思關梁淡相對顏色淺停雲  
渺爲愁殺蒸可崇饌食之寧永飢臨分復三咽

度淮寄養浩

竹清寒房靜殘月在西壁悄悄燈景微尸坐棄枕席井華  
飲蟾蜍元雲成五色明知非世謀精詣在六籍我行長淮

浪凍樹挾春碧夢子白紵寬雙眸炯空激書來婁在手此  
意何的的數面不成歡遠別迺復惻歸雁臨風翔先之寄  
淡臆

懷伯生

春雨消路塵春風散林纈蕩蕩長安門客子千萬轍城陰  
有一士淡食羹不啜采彼松上露煮石化晴雪沈冥護真  
性觴至那復說向來舌本談今作耳根熱維南有樛枝巖  
溜滋百結在德良自防居屯詎爲折念此長夜淡寒光吐  
殘月

酬蕭靜安提舉二首

溜泉散餘塵稍稍軒檻清孤風起天末縹緲參差鳴佳音

寂萬籟異采含蜚英眾葉豈不光終然哆春榮翩翩者何  
雛和之欲成聲迺知雲間意非復區中情  
有客何方來贈以雙南金維時夏初溽寒光激元陰至靜  
閱真賞獨晤諧希音伊江渺風濤伊林復崎嶇出處各未  
得冥思結長吟於粲不能報泠泠手中琴

題劉充之載月圖

磊落太古月搖蕩湘君波寒晶爍膏露倒景流銀渦湛湛  
洲渚淨天風泛飛槎晃蕩神界中四客歎且歌憑虛歷空  
洞金粟搖靈柯流光闕星斗怪影窺蛟鼉服食詎在酒三  
咽顏爲醜俯仰會合初逝者已山阿昂昂菊間叟秉芳獨  
婆娑微茫信可傳披圖重吟哦

壽賈參議二首

粲粲雪中松八表迴鸞翔下有采著叟澄觀振高岡握著  
玩鴻濛竹簡儼在旁湛焉貫纍珠炳變猶龍章笑指青松  
言貞固以自防細縷迺元化清雲表奇光  
嘉平維吉辰初陽起天心彩鳳歛參差落落空洞音徘徊  
碧雲宇賓從羅清林神鼎朝已調芳醴時當斟損益在我  
手啟齒歌瓊吟煌煌秉令德盼彼西山岑

次韻揭教授官閩中

鬱鬱太古樹藁生散珠玕明時炳陽德寥落歛歲寒天風  
西北來凍海飈層瀾芳朽各有性盛衰詎無端貿貿冰上  
屨黯黯塵中冠宿志不得醺奮飛戢其翰伊南蹇一士羈

鴻河之干手持大雅篇八音佐王官牆陰臥朝日薄飯不  
滿槃邂逅喜我同金石生肺肝出處非故意低徊耿相看  
閩山渺雲濤東望通三韓居夷聖有在取琴爲君彈

寄題撫州先天觀

浩浩太古石雕鏤矜嵯峩瓊林化飛騫寶構窮鬱羅矯首  
視三光丹青相盪摩上鄰列仙館西移瑤池柯玉蛟亦受  
令鞭撻迴盤渦巍巍雙華表飛鳥不敢過元鶴時一來潛  
鱗淨無波心跡會虛湛神光隱鳴鼉緬彼巢居子凝睇佩  
女蘿天風入紫京百靈莫誰何朗言渾沌後龍馬方負河  
視之杳不見嘉名表山阿冥思有至理熟視時摩挲

送牟景陽教授天台

峩峩陵陽翁麟筆凝秋霜採芝空巖曲白雲以爲糧微言  
酌太古妙思歌瓊章餘人涉其藩自謂真班揚此道端未  
泯我心何由降

五良秀高門用處各有在伯如幽蘭淡仲若春雲藹叔也  
端可人芳林起新蕾垂天得扶搖一決度江海相逢慰傾  
倒曾次澆磊砢

天台古儒林秀士英且明君行振遺緒家學揚清聲文詞  
尙理性此弊無由更眾咻方爾羣獨拍何當鳴爲問舒與  
胡寒庭草青青

閩風梅  
澗也

功名不願多我輩端可免南州已寥落屈指閱諸彥汰如  
糠在前得若車度坂愛君不可畱尊鱸慰佳願黃塵我何

事寒燈起清歎

雲隱齋

油油山之椒翁忽變平陸下上何其勞一息返神谷凝光  
養澄觀清潤積新沐知白吾未能寒聲起林木

劉朔齋侍郎孫希孟能琴欲訪子昂觀松雪琴以

詩寄之

雨雪戒修塗苒苒歲云暮維舟望鄉國煙樹渺無度永懷  
松雪翁買田成隱趣齋中六尺琴清徹仙掌露虛聲合空  
洞天籟生磬濩勿為離鸞吟眉壽以保魯時有悼  
亡之戚

送胡安常河南省員外郎

陽春惠澤廣蠕動回昭蘇皎皎尚書郎佐理勤居諸澄懷

罄輸納疾首宣訃謨黃流交道周髣髴桑柘墟驅馬憇枯  
磔詢彼壘上夫歌臺久寂歷商聲助清歛昔有屠羊子慷  
慨成須臾感激車上禮朔風為之吁俠氣散鋒鏑侈習翳  
榛蕪舉觴酌其蹤興廢今何如三河水門記白粲來東吳  
願言表里道坐使民驩虞

次韻張秋泉墨蘭

虛窗秋思集晨興憺無餘墨池漾清泉天葩散紛敷愛此  
巖中君贈以碧玉腴微雲解蒼佩縹緲疑空無遠謝丹白  
昏詎畏霜霰濡守黑志有在談元道非殊愧彼夷與齊絮  
腹不受汚湘纍慨永古世人陋其迂臨風嗅餘清是豈真  
緇徒迺知萬化寂妙巧窺分銖幽蜂綴疎蘂點點游晴虛

閉門謹視之黃塵政紛如

...

...

...

清容居士集卷第三

...

